

# Najib dikelilingi penasihat dungu

BH - 9/11/2020 m/s:6

## SPRM dedah rakaman audio wanita dipercayai Rosmah berang terhadap suami

**Kuala Lumpur:** Datin Seri Rosmah Mansor menyifatkan, Datuk Seri Najib Razak dikelilingi penasihat yang dungu, dalam menangani skandal berkaitan syarikat pelaburan, 1Malaysia Development Berhad (1MDB).

Dalam rakaman audio diyakini tulen oleh Suruhanjaya Pencegahan Rasuah Malaysia (SPRM) yang didedahkan semalam itu, seorang wanita dipercayai Rosmah kedengaran berang terhadap Najib.

Dalam rakaman audio itu, Rosmah menyifatkan Najib lambat bertindak dalam skandal 1MDB sehingga bekas Perdana Menteri terbabit dilihat seperti penjahat.

Rosmah juga didengari mendesak Najib mendengar nasihatnya, khususnya dalam isu pelantikan Tan Sri Dzulkipli Ahmad bagi

menggantikan Tan Sri Abu Kassim Mohamed yang ketika itu menjadi Ketua Pesuruhjaya SPRM yang baharu.

Dzulkipli dilantik sebagai Ketua Pesuruhjaya SPRM yang baharu pada 1 Ogos 2016.

Berikut transkrip rakaman audio antara Najib dan Rosmah menerusi panggilan telefon dipercayai berlangsung enam minit pada jam 12.46 tengah malam pada 27 Julai 2016.

**Najib:** Hi.

**Rosmah:** Apa cerita? Boleh saya nasihatkan kamu sesuatu?

**Najib:** Ok, ada apa?

**Rosmah:** Dengar cakap saya, mereka beritahu kamu untuk henti mengasak Abu Kassim Mohamed (ketika itu sebagai Ketua Pesuruhjaya SPRM)... sekarang Abu Kassim pergi konvensyen bersama Pak Lah (Tun Abdullah Ahmad Badawi), bergambar dengan Pak Lah, dia dilihat sebagai wira, kamu pula penjahat dan tidak boleh ke lima orang ini melihat kamu sebagai keutamaan bukan orang lain.

**Najib:** Hmm...hmm

**Rosmah:** Pastinya Shahlan dah yakin, Tengku dah yakin, Amhari dah yakin... macam kita yang penjahat.

(Shahlan dipercayai merujuk bekas Setiausaha Politik Najib, Datuk Shahlan Ismail, Tengku - bekas Setiausaha Akhbar Najib, Datuk Seri Tengku Sariffuddin Tengku Ahmad, manakala Amhari - bekas Pegawai Khas Najib, Datuk Amhari Efendi Nazaruddin.)

**Najib:** Tidak...tidak. Saya sudah benarkan Azwan (dipercayai merujuk kepada bekas Naib Ketua Pemuda UMNO, Khairul Azwan Harun), membuat kenyataan, kesannya dah bagus.

**Rosmah:** Azwan, ok bagus. Hari ini Abu Kassim (di) BH ambil gambar dengan Pak Lah lagi. Ada muka dia nak berterima kasih kepada Pak Lah dan semua orang lain kecuali kamu. Ini tidak adil.

**Najib:** Faham

**Rosmah:** (Audio perbualan tidak jelas)

**Najib:** Saya sudah tandatangani

surat pelantikan Dzul sebagai Ketua Pesuruhjaya SPRM baharu.

BH pada 27 Julai 2016 melaporkan Abu Kassim berterima kasih kepada Abdullah yang disifatkannya sebagai tokoh penting menukarkan Badan Pencegahan Rasuah (BPR) kepada SPRM.

Selain Abdullah, Majlis Penghargaan Bersama Ketua Pesuruhjaya SPRM itu turut dihadiri isterinya, Tun Jane Abdullah; bekas Gabenor Bank Negara, Tan Sri Zeti Akhtar Aziz; Menteri Pelancongan dan Kebudayaan, Datuk Seri Mohamed Nazri Aziz; bekas Speaker Dewan Negara, Tan Sri Abu Zahar Ujang serta bekas Ketua Polis Negara, Tan Sri Musa Hassan.

Rakaman audio diyakini tulen oleh SPRM itu, turut mendedahkan Rosmah tidak gembira dengan situasi yang berlaku ketika itu.

Rosmah turut menggesa Najib mempelawa Ketua Eksekutif Mubadala Development Company (MDC), Khaldoon Al-Mubarak, ke rumah mereka dipercayai ba-

gi membincangkan antaranya isu anak tiri Najib, Riza Aziz yang dikaitkan dengan skandal 1MDB.

Riza Aziz adalah juga produser filem Hollywood dan dikaitkan dengan skandal 1MDB, termasuk dakwaan menggunakan wang 1MDB untuk menerbitkan sebuah filem, *The Wolf of Wall Street* yang dibintangi Leonardo DiCaprio.

**Rosmah:** Mungkin Khaldoon perlu datang sini, bercakap dengan awak dan Amhari, boleh selesaikannya. Itu apa yang saya rasalah, bukan menerusi perbualan telefon, ia tidak akan berjaya.

**Najib:** Kita boleh pelawa dia (ke Malaysia) dan selesaikan masalah ini.

**Rosmah:** Pelawa dia dan selesaikan masalah ini, bukannya dia tak kenal kita. Kalau dah makan minum di rumah kita.

**Najib:** Itu idea yang baik, kita boleh jemput dia datang

**Rosmah:** Pada masa sama, kita boleh selesaikan masalah Riza, masalah Riza *somewhere along the line*, itu aje.

